

इवनिंग डोगरी न्यूज़ बुलेटिन

समे-18:15 Hrs

<><><><><><>

Headlines

- उपराज्यपाल मनोज सिन्हा होरें आखेआ ऐ जे आतंकवाद दे पूरे पराते तंत्र, साजिश रचने आहले ते आतंकवाद गी मदद उपलब्ध करोआने आहलें गी पूरी चाल्ली खत्म कीता जाना लोड़चदा।
- उपराज्यपाल मनोज सिन्हा होरें आखेआ जे जम्मू-कश्मीर च कला, साहित्य, संगीत ते रीति-रिवाजें च समृद्ध संस्कृति बन-सबन्नता ऐ ते इय्ये लोकें गी इक्क दुए कन्नै जोड़दी ऐ।
- प्रधानमंत्री नरेंद्र मोदी होरें ब्रिक्स दे सदस्य मुखें गी आखेआ जे ओह किट्ठ होइऐ आतंकवाद ते आतंकवादी गतिविधिं गी रपेआ-पैहा उपलब्ध करोआने आहलें कन्नै सखती नै निब्बड़न।
- वित्त मंत्री निर्मला सीतारमण होरें आखेआ जे आयुष्मान भारत स्कीम समाजी सुरक्षा दे बेहतरीन कार्यक्रमें दा इक्क ऐ।

<><><><><><>

LG-Security Meet

उपराज्यपाल मनोज सिन्हा होरें अज्ज श्रीनगर दे राजभवन च कश्मीर संभाग दी सुरक्षा बारे इक समीक्षा बैठक कीती। उपराज्यपाल होरें जम्मू-कश्मीर दे अधिकारियें गी आखेआ जे ओह मजदूरें दी सुरक्षा लेई मुख बुनियादी ढांचे सरबन्धी परियोजनाएं ते निर्माण शिविरें दे कोल सुरक्षा ग्रिड गी

होर मजबूत करने लेई उपायें गी यकीनी बनान। एल.जी होरें पुलस गी निर्देश दिते जे ओह बुनियादी ढांचे सरबन्धी परियोजनाएं दा सुरक्षा ऑडिट पुख्ता थाहें उप्पर 24 घंटे नाका ते रातीं दी गश्त उप्पर कम्म करन। एल.जी होरें आखेआ जे अपराधियें ते आतंकवादियें दी मदद करने आहलें सने पूरे आतंकवादी इको सिस्टम गी खत्म करने दी लोड़ ऐ।

<><><><><><>

LG-Jashn-e-Sangam

उप-राज्यपाल मनोज सिन्हा होरें कल श्रीनगर दे टेगोर हाल च जशन-ए-संगम दा उद्घाटन कीता। अपने संबोधन च उपराज्यपाल होरें जम्मू-कश्मीर कला, संस्कृति ते भाशा अकादमी ते इक समिति आस्सेआ कला संस्कृति ते भाशा गी बढ़ावा देने लेई 3 रोजा साहित्यिक उत्सव दा आयोजन करने लेई उंदी सिफत कीती। उनें आखेआ जे जम्मू-कश्मीर कला, साहित्य, संगीत ते लोक परम्परा दा समृद्ध खजाना ऐ जेहड़ा इत्थूं दे लोकें गी कट्ठे बन्नी रखदा ऐ। उनें एह बी आखेआ जे जशन-ए-संगम जनेह उत्सव भाशा, संस्कृति ते बक्ख-बक्ख क्षेत्रें दे लोकें गी जड़ें कन्नै जोड़ने दे संस्कृति दा जशन मनाने लेई इक थाह दिंदा ऐ जेहड़ा एक भारत श्रेष्ठ भारत दी भावना उप्पर बी खरा उतरदा ऐ। उनें एह बी गलाया जे राश्ट्री शिक्षा नीति 2020 च बी मातृभाशा गी बढ़ावा देने लेई ते स्कूलें च बच्चें गी मातृभाशा च पढ़ाई करने लेई आखेआ गेआ ऐ। उपराज्यपाल होरें प्रधानमंत्री नरेंद्र मोदी हुंदे पिछले किश बरें च जम्मू-कश्मीर दियें भाशाएं जियां हिंदी, डोगरी, कश्मीरी, उर्दू, गोजरी, पहाड़ी, पंजाबी ते शिना गी बढ़ावा देने लेई जेहड़े कदम चुक्के न उंदी सराहना कीती। इस मौके पर उपराज्यपाल होरें कश्मीर संभाग दे बच्चें गी जिनें 10जमात च हिंदी सब्जेक्ट च शैल नंबर हासल कीते न, उनेंगी सम्मानित कीता। उनें आखेआ जे युवाएं गी लललेश्वरी, शेख-उल-आलम, संत कबीरदास ते होर दुए सूफी संतें दे जीवन कोला मता किश सिक्खना चाही दा ऐ।

<><><><><><>

LG-Visit

उपराज्यपाल मनोज सिन्हा होर कल गांदरबल दे गगनगीर दा दौरा लाया ते उत्थे कम्म करा करदी एजेंसी दे अफसरें ते कर्मचारियें कन्नै मलाटी कीती ते प्रोजेक्ट साइट उप्पर सुरक्षा इंतजामें दी समीक्षा कीती। अपने इक्क दौरे दौरान उपराज्यपाल होरें पुलस दे अफसरें, प्रशासन दे अधिकारियें, एजेंसी दे अधिकारियें ते सुरक्षा एजेंसिएं कन्नै इक बैठक दी अध्यक्षता कीती। बैठक दौरान उनें निर्देश दिता जे सुरक्षा दे पुख्ता इंतजाम कीते जान तां जे इये नेह आतंकी हमले परतियै नेई होई सकन।

<><><><><><>

LG-JU

उपराज्यपाल मनोज सिन्हा होरें कल जम्मू युनिवर्सिटी च International Conference on endocrinology/ Metabolism ते reproduction: Exploring New frontiers दा उद्घाटन कीता। उनें अपने संबोधन च इस कांफ्रेंस लेई Deptt. Of zoology ते India Society for comparative endocrinology दी सराहना कीती। उपराज्यपाल होरें स्वस्थ समाज लेई संसाधन दे शिखाविद दी अहम भूमिका दी सराहना कीती। उनें केंद्र शासित प्रदेश जम्मू-कश्मीर च शिक्षा दे क्षेत्र च बदलाव दी अगुवाई करा'रदी जम्मू युनिवर्सिटी दी बी सराहना कीती।

<><><><><><>

Katra-Expressway

रियासी दे जिला विकास कमिशनर विशेष महाजन होरें अज्ज दिल्ली-अमृतसर-कटड़ा एक्सप्रेस-वे प्रोजेक्ट दी प्रगति दा जायजा लैता। उनें जमीन दे मालकें गी मुआवजा देने दे अलावा हासल होई दी जमीन दी बी समीक्षा कीतीं स्हाढ़े जिला संवाददाता देवेन्द्र ठाकुर हुंदे कन्नै गल्लबात करदे होई डी.सी विशेष महाजन होरें आखेआ।

<><><><><><>

Samba-Employment

साम्बा जिले दा रोजगार ते परामर्श केंद्र बेरोजगार युवाएं दी मदद आस्तै मुमकन तेजस्विनी ते Spurring Entrepreneurship Initiative जनेह केई होर स्वरोजगार योजनाएं गी लागू करा'रदी ऐ तां जे ओह यातायात क्षेत्र दे कन्नै-कन्नै होरनें क्षेत्रें च बी अपना कारोबार शुरू करी सकन। स्हाढ़े जिला संवाददाता सतपाल शर्मा हुंदे कन्नै गल्लबात करदे होई साम्बा जिले दे रोजगार ते परामर्श केंद्र दे असिस्टेंट ड़ैक्टर नरेश कुमार होरें आखेआ।

<><><><><><>

PM-BRICKS

प्रधानमंत्री नरेंद्र मोदी होरें ब्रिक्स दे सदस्य मुखें गी आखेआ ऐ जे ओह संगठित होइए सहयोग कन्नै आतंकवाद ते आतंकवादी गतिविधिएं गी रपेआ-पैहा उपलब्ध करोआने आहलें कन्नै सखती नै निब्बड़न। उनें आखेआ जे इस गंभीर मुद्दे पर दोहरे मानदंडें दी कोई गुंजैश नई ऐ। कजान च 16में ब्रिक्स शिखर सम्मेलन दे समापन सत्र गी संबोधित करदे होई मोदी होरें आखेआ जे युवाएं गी कट्टर बनाने आहली ताकतें गी रोकने आस्तै सक्रियता कन्नै कम्म करना होग। उनें संयुक्त राष्ट्र च विचाराधीन अंतरराष्ट्रीय आतंकवाद पर व्यापक समझौते दे मुद्दे पर कम्म करने दा आहवान कीता। प्रधानमंत्री होरें एह बी आखेआ जे साइबर सुरक्षा ते आर्टिफिशल इंटेलीजेंस गी सुरक्षित बाने सरबन्धी वैश्विक दिशा-निर्देश पर कम्म करना लोड़चदा। प्रधानमंत्री होरें आखेआ जे ब्रिक्स शिखर सम्मेलन ऐसे समें पर होआ'रदा ऐ जिसले दुनिया युद्ध, संघर्ष, आर्थिक यक्को-तक्की, जलवायु बदलाव ते आतंकवाद सने नेकां चुनौतिएं दा सामना करा'रदी ऐ। मोदी होरें आखेआ जे भारत युद्ध दा नई सगुआं गल्लबात ते कूटनीति दा समर्थक ऐ। प्रधानमंत्री होरें आखेआ जे ब्रिक्स सुरक्षित, मजबूत ते समृद्ध भविष्य आस्तै नमें मौकें दे सृजन आस्तै सक्षम न

ते कोविड-19 गी मिलिए हराइये ब्रिक्स नै अपनी क्षमता साबत कीती ऐ। मोदी होरें आखेआ जे ब्रिक्स दा दुनिया च एह स्नेहा जाना लोड़चदा ऐ जे ओह बंड पोआने आहला नेई सगुआं जन हितकारी संगठन ऐ। प्रधानमंत्री होरें आखेआ जे भारत ब्रिक्स सांझेदारें दे तौर पर नमें मुख्यें दा सुआगत करने लेई तैयार ऐ। उनें संयुक्त राष्ट्र सुरक्षा परिषद, बहुपक्षी विकास बैंकें ते विश्व बपार संघ ज्नेई वैश्विक संस्थाएं च समेबद्ध ढंगै सिर सुधार लागू करने पर बी जोर पाया।

<><><><><><>

Sitharaman-Ayushan

वित्त मंत्री निर्मला सीतारमण होरें आखेआ जे आयुष्मान भारत योजना सामाजिक सुरक्षा दे उत्कृष्ट कार्यक्रमें चा इक ऐ। अमरीका च पेंसिल्वेनिया युनिवर्सिटी दे तैहत इक कार्यक्रम दौरान खजाना मंत्री होरें आखेआ जे एह कार्यक्रम लोकें गी सेहत बीमा प्रदान करने लेई शुरू कीता गेआ ऐ। एहदे तैहत 6 करोड़ 30 लक्ख थ्वां मते लोकें गी अस्पताल च इलाज उपलब्ध करोआया गेआ ऐ। उनें एह बी आखेआ जे हुन इस कार्यक्रम दा लाह 70 बरे थ्वां मती उम्मी दे सारे लोकें आस्तै उपलब्ध ऐ। डिजिटल ढांचे बारे खजाना मंत्री होरें आखेआ जे भारत दे नागरिक गी डिजिटल एक्सेस प्रदान कीती गेई ऐ जेड़ा इक शक्तिशाली माध्यम ऐ। उनें आखेआ जे डिजिटल ढांचे दी बदौलत भारत तेजी कन्नै बददी अर्थ बवस्था बनेआ ऐ।

<><><><><><>

Joshi-Chana Dal

केंद्र नै अज्ज भारत ब्रैंड चना दाल दी बिक्री दा दुआ गेड़ शुरू कीता ऐ। भारतीय राष्ट्रीय सहकारी उपभोक्ता परिसंघ लिमिटेड एन.सी.सी.एफ ते भारतीय राष्ट्रीय कृषि सहकारी विपणन परिसंघ-NAFED दे माध्यम राएं एह बिक्री कीती जा'रदी ऐ। गड़िणं गी झंडी दस्सिए रवाना करदे होई उपभोक्ता मामले, खुराक ते सार्वजनिक बंड सरबन्धी केंद्री मंत्री प्रहलाद जोशी होरें दस्सेआ जे

भारत चना दाल केंद्री भंडार, मोबाइल वैन, नेफेड ते ई-कामर्स राएं 70 रपे फही किलो दी दर कन्नै उपलब्ध होग। एहदे अलावा चना 58 रपे फही किलो, भारत मूंग दाल 107 रपे फही किलो ते मसर दी दाल 89 रपे फही किलो स्हाबै उपलब्ध होग। उनें आखेआ जे सरकार नै E-I Nino असर करी चना दाल थ्वां आयात शुल्क हटाई दिता हा। उनें आखेआ जे सरकार नै मूल्य स्थिरता कोष च 10 जहार करोड़ रपे अलॉट कीते न। इस रकम दा इस्तेमाल महंगाई पर काबू करने आस्तै कीता जा'रदा ऐ।

<><><><><><>

Gadkari-World Congress

केंद्री शिड़क यातायात ते राश्ट्रीय जरनैली शिड़कें सरबन्धी मंत्री नितिन गडकरी होरें मुख्य दे सालाना ईंधन आयात च फौरी तौर पर कमी आहनने पर जोर पाया ऐ। मौजूदा समें च हर बरे 22 लक्ख करोड़ रपे दे ईंधन दा आयात हुंदा ऐ। नमीं दिल्ली च इंजीनियरिंग प्रबंधन बारै 18में विश्व सम्मेलन गी संबोधित करदे होई गडकरी होरें आखेआ जे टेक्नोलॉजी भारत गी 5 ट्रिलियन डॉलर दी अर्थ बवस्था बनाने दे प्रधानमंत्री नरेंद्र मोदी हुंदे सुखने गी पूरा करने दा असरदार माध्यम ऐ। उनें लोड़ मताबक शोध ते अनुसंधान पर जोर पाया।

<><><><><><>

Khelo-India

भारतीय सेना नै युवा सेवा ते खेड् सरबन्धी मैहकमा उधमपुर दे सहयोग कन्नै खेलो इंडिया अभियान तैहत उधमपुर दे मिनी स्टेडियम च वॉलीबॉल प्रतियोगिता दा सरिस्ता कीता। इसदा मकसद खेड् ते समुदायिक शमूलियत गी बढ़ावा देना ऐ। इये नेह् कार्यक्रमें कन्नै नां छड़ा सेहतमंद मुकाबलेबाजी गी बढ़ावा थ्हांदा ऐ सगुआं सांस्कृतिक आदान-प्रदान, आपसी रिश्तें गी बढ़ावा देना ऐ। भारतीय सेना नै उधमपुर दे लोकें दा इस आयोजन च बदी-चढ़िए हिस्सा लैने

आस्तै आभार जाहिर कीता। उधमपुर आहले जिला संवाददाता अचिन दुबे कन्नै गल्ल करदे होई
रोमेश चंद्र मिश्रा होरें आखेआ।

<><><><><><>